

RHODESIA

EXC.MI P. D. ADOLFI FÜRSTENBERG

Episcopi Abercornensis (Abercorn)

Die 15 aprilis 1960

Eminentissime ac Reverendissime Domine,

Litteras Eminentiae Vestrae die 21 martii 1960 datas, sub numero 1 C/59-64 bis, summa observantia accepi et perlegi.

Libentissimo animo, desiderio voluntatique Summi Pontificis obsequor in proponendis animadversionibus quae, ut mihi videtur, in futuro concilio perutiliter tractari poterunt.

Primo mihi ut Ordinario in locis missionum constituto locus sit convertere animos Venerabilium Patrum S. Concilii ad obligationem quam habent omnes Christifideles, praesertim autem Episcopi et sacerdotes, adiuvandi ad propagandam fidem non solum in patria sua, sed etiam in finibus exteris. Quae obligatio, mea quidem opinione et experientia, non satis intelligitur et proponitur. Certe, can. 1322 ius et officium Ecclesiae evangelicam doctrinam docendi vindicat, canone tamen 1350 universa missionum cura Sedi Apostolicae unice reservatur. Qui canon male interpretari potest quasi derogans vel diminuens obligationem individuum cum Episcoporum tum sacerdotum tum christifidelium, adiuvandi pro suis quisque viribus ut regnum Christi omnibus in locis propagetur. Valde profuturum esse censeo causae propagationis fidei si haec obligatio adiuvandi missiones externas plane et distincte a Patribus Concilii enuntiaretur et plane singularique modo in Codice consignaretur.

Alterum votum quod venerandae Commissioni Pontificiae proponere mihi cordi est spectat ad simplificationem legum liturgicarum et praesertim rubricarum. Opus disciplinae liturgicae corrigendae et emendandae a SS. D. N. Pio XII feliciter inchoatum plane cumulateque perficere maximae utilitatis foret cum sacerdotibus tum fidelibus.

Quae duo puncta, reverentia qua par est, Eminentiae Vestrae submitto adprecans benedictionem caelestem a Domino pro felici et bono successu muneris commissi.

Interim S. Purpuram reverenter deosculor.

✠ ADOLFUS FÜRSTENBERG
Episcopus Abercornensis

2

EXC.MI P. D. ADOLFI G. SCHMITT

Episcopi Bulauaiensis (Bulawayo)

Die 22 augusti 1959

Rogatus a Pontificia Commissione Antepreparatoria pro Concilio Oecumenico omni cum libertate et sinceritate animadversiones, consilia et vota, quae pastoralis sollicitudo zelusque animarum suggerant circa res et argumenta quae in futuro Concilio tractari poterunt, censeo proponere haec:

I.

A Concilio futuro Oecumenico investigandae sunt et inveniendae viae et methodi, quibus schismatici et haeretici reunificari possint ad S. R. Ecclesiam.

Ad quem finem assequendum mihi liceat recommendare invitationem Patriarcharum et Episcoporum Ecclesiarum Orientalium necnon Moderatorum sectarum Christianarum ad Concilium Oecumenicum ut cum eis tractetur et elaboretur Ecclesiologia (scil. de Corpore Christi Mystico — de gente, populo, familia Dei; de Episcopo Romano tamquam capite populi Dei, de Episcopis ecclesias singulas iure proprio regentibus sub iurisdictione Episcopi Romani).

Providendum est ministris sectarum desiderantibus reconciliari S. R. Ecclesiae.

II. *Liturgia*

1. Breviarium dicendum a clericis in cura animarum mutetur et simplificetur.

2. Tempus celebrationis Missae determinandum relinquatur Episcopis in Missionibus.

3. In Missionibus ceremoniae praecedentes Baptismum mutantur et simplificentur.

III. *Disciplina*

In Missionibus saltem leges de ieiunio et abstinentiae accomodentur conditionibus hoc modo quo commutentur et substituantur a legibus requirentibus a fidelibus abstinentiam ab aliis oblectamentis et delectationibus; quae leges statuuntur ab Episcopis singularum Provinciarum.

✠ ADOLFUS G. SCHMITT
Episcopus Bulauaiensis

3

EXC. MI P. D. ALOYSII HAENE

Episcopi Guelensis (Gwelo)

Immensee (Helvetia), die 29 aprilis 1960

I. *Decretum doctrinae de Mystico Corpore Christi*

Cum Summus Pontifex in proclamatione Oecumenici Concilii hoc ipsum tamquam testimonium unitatis Ecclesiae convocare voluerit:

cumque doctrina de Ecclesia uti Mystico Corpore Christi iam multis tractatibus theologicis exposita praesertim in Encyclica *Mystici Corporis* S. P. Pii XII praeclare sit tractata,

liceat mihi quaerere, num ad exemplum pristinorum Conciliorum haec doctrina in nova capita fidei redigi atque sollemniter promulgari et proclamari possit.

Finis huiusmodi proclamationis non tantum in eo esset, ut fides in tantum mysterium unitatis augetur, sed etiam ut fratribus nostris ab Ecclesia Sancta separatis, unitatem vero quaerentibus, per hanc doctrinam profundius argumentum unionis ostentatur.

Redigatur ergo, si libet, per Theologos peritos, documentum professionis fidei piaeque petitionis Christianorum ad mentem orationis Summi Sacerdotis Nostri Iesu Christi: « ut omnes unum sint, sicut tu, Pater in me, et ego in te, ut et ipsis in nobis unum sint: ut credat mundus quia tu me misisti » (Io 17, 21).

II. *Decretum de scientia naturali tamquam ancilla revelationis divinae*

Progressus scientiarum naturalium explorationesque criticae ac novae theoriae fidem tangentes, e. g. de origine humani generis, quae nostris temporibus in scriptis tam multum propagantur mentesque movent, hoc admodum postulare videntur, ut denuo exponatur ac confirmetur doctrina Ecclesiae de relatione inter scientiam naturalem et revelationem divinam.

Quaerendum insuper erit, num opportunum sit, quoad hypotheses de evolutione principia doctrinae sacrae definire.

III. *Decretum de limitatione prolis*

Etiam in territoriis Missionum his diebus iniqua praxis limitationis prolis propagatur. Videtur opportunum esse sollemniter proclamare doctri-

nam et principia iuris naturalis et divini quae iam in Encyclica *Casti Connubii* » S. P. Pii Papae XI exposita atque in allocutionibus Summorum Pontificum iterum iterumque confirmata sunt.

IV. De relatione inter Ecclesiam et Statum civilem

Nostris his temporibus etiam in Continente Africae non pauci novi Status civiles se constituunt auctoritatemque assumunt. Inde pergraves oriuntur contentiones inter stirpem indigenarum et homines ex Europa provenientes.

Valde optabilis ergo videtur sollemnis declaratio iurium naturalium cuiusvis gentis necnon instructio de relationibus inter Ecclesiam et statum civilem. Confirmentur etiam iura Ecclesiae quoad educationem prolis christianae, praesertim etiam in statibus cum compluribus religionibus.

V. De Actione Catholica

Utile mihi videtur in revisione Codicis Iuris Canonici sub Titulo « De Laicis » canones de Actione Catholica inserere ita ut principia et directivae S. Sedis ultimis annis editae, summatim exponantur.

✠ ALOYSIUS HAENE
Episcopus Guelensis

4

Exc.MI P. D. MARCELLI DAUBECHIES

Episcopi Kasamaënsis (Kasama)

Chilubula, die 25 augusti 1959

Eminentissime Domine,

Eminentiae Vestrae litteras die 18 mensis iunii anni currentis datas, Prot. N. I C/59-708, grato animo accepi. Libenter amplector occasionem oblatam communicandi Commissioni Antepreparatoriae pro Concilio Oecumenico ea quae mihi quaerenti occurrerunt aptaque visa sunt ut in futuro Concilio tractentur.

Accommodationes sequentes sive S. Canonum sive Ritualis Romani vel etiam S. Liturgiae mihi valde opportunae videntur:

1. Accommodatio in conferendo Baptismo: Valde prodest tum catechumenis baptizandis cum sacerdote baptismum conferenti si prima pars caeremoniarum baptismi uti continetur in Rituali Romano pro baptismo adultorum, tit. II, cap. II, n. I usque ad numerum 28, separatim adhiberi

posset aliquid temporis ante collationem baptismi proprie dicti. Ita prima pars convenit catechumenis. Praesertim in locis Missionum ubi saepe magnus numerus catechumenorum uno eodemque tempore convenit ad baptismum suscipiendum, administratio baptismi ultra duas vel tres horas protrahitur; id grave et molestum est omnibus participibus neque attentioni vel pietati favet.

2. Accommodatio can. 1248 quoad festa de praecepto quae in diem profestum incurrunt neque a potestate civili tamquam dies feriati admittuntur. In hisce festis de praecepto quae a potestate civili non ut feriata agnoscuntur obligatio abstinendi ab operibus servilibus supprimatur atque obligatio audiendi Missam unice praescribatur. Vel potius Ordinariis locorum facultas detur dispensandi, non solum in casibus singularibus, sed generatim atque universe pro suis quisque territoriis.

3. Accommodatio can. 1250-1254 qui de abstinentia et ieiunio tractant. Valde prodesset legem mitigare eamque adaptare hodiernis circumstantiis; sic evitarentur numerosae dispensationes que confusionibus permultis ansam dant.

4. Abbreviare et simpliciore reddere formulam Professionis Fidei quae requiritur a can. 1406. Quaeritur etiam nunc adhuc necessarium hodiernisque temporibus congruens sit Iuramentum Anti-Modernisticum?

5. Accommodatio S. Liturgiae quoad Litanias Maiores et Minores. In multis regionibus istae Litaniae occurrunt tempore hiemis ubi nullae segetes in agris remanent neque tempus segetum adest neque tempus messis. Melius videtur Ordinariis locorum committere ut constituent tempus aptum ad istas Litanias faciendas.

6. Valde desiderabile exstat ut quoad promulgationes mutationum tam in legislatione ecclesiastica quam in Sacra Liturgia praevideatur distantia locorum et difficultas communicationum in locis Missionum. Per saepe accidit ut tales mutationes nimis sero in notitiam Ordinariorum perveniant ita ut Ordinarii eas subditis tempestive communicare non possint.

7. Demonstrationi universalitatis et catholicitatis ecclesiae multum prodesset, praesertim quoad acatholicos, si assignatio munerum et officiorum pro administratione generali Ecclesiae adhuc magis internationalis exstaret.

Sacram purpuram exosculans, et omnia fausta Eminentiae Vestrae adprecans, Eminentiae Vestrae humillimus in Christo servus,

✠ MARCELLUS DAUBECHIES
Episcopus Kasamaënsis

5

EXC.MI P. D. TIMOTHEI F. O'SHEA
Episcopi Livingstonensis (Livingstone)

16 aprilis 1960

Eminentissime Domine,

Hodie Tuae Eminentiae mitto responsionem ad litteras et petitionem diei 18 iunii 1959, quibus petisti opiniones et consilia pro futuro Concilio Oecumenico.

Volo petere veniam ab Eminentia Tua propter moram meam culpabilem. Videtur mihi tamen has opiniones meas esse vere parvi momenti.

1. Num possit reperiri aliquis modus distribuendi sacerdotes, fratres et sorores, necnon et auxilia et opes Ecclesiae, ut aequaliter distribuantur in omnibus regionibus; et ut etiam instituantur armaturae scientiarum et artium ad adiuvandam Ecclesiam in regionibus non bene evolutis, praesertim in missionibus.

2. Num possit pro Missis pro Diebus Dominicis novam delectionem fieri lectionum Epistolarum et Evangeliorum. Videntur aliquae, praesertim Epistolae, difficiles et obscurae.

3. Num possit maior usus permitti linguae vernaculae in Rituali Romano.

Osculans sacram purpuram me profiteor

Eminentiae Tuae Reverendissimae
 filius oboediens

✠ TIMOTHEUS F. O'SHEA
Episcopus Livingstonensis

6

EXC.MI P. D. ADAM KOZLOWIECKI
Archiepiscopi Lusakensis (Lusaka)

Ridgeway - Lusaka, die 21 augusti 1959

Eminentissime Princeps,

Litteris Eminentiae Vestrae diei 18 iunii huius anni respondendo (Prot. N. I C/59-1239), quas maxima cum gratitudine accepi, sequentia mihi suggerenda videntur:

1. Pars Quinta, Libri Tertii *Codicis Iuris Canonici* ad praesentia rerum adiuncta melius mihi adaptanda videtur. Multis in regionibus Ecclesia hodie nulla habet beneficia. Magis accurate ideo declarandae mihi videntur obligationes populi Christiani, in doctrina de Corpore Christi Mystico fundatae.

2. Desiderabilis mihi videtur interpretatio can. 1258 in spiritu maioris caritatis. In multis regionibus acatholicis, attamen Christianis, participatio — etiam activa — Catholicorum in communibus cum Christianis acatholicis precibus (non in stricte dictis « sacris ») nequit interpretari ut approbatio doctrinae erroneae, immo, in certis casibus, Catholicorum absentia a precibus scandalo est.

Sacram Purpuram maxima cum devotione deosculans, me profiteor

Eminentiae Vestrae Reverendissimae
servum in Christo infimum

✠ ADAM KOZLOWIECKI
Archiepiscopus Lusakensis

7

Exc.MI P. D. FRANCISCI C. MAZZIERI
Episcopi Ndolaënsis (Ndola)

Ndola, die 7 septembris 1959

Eminentissime Domine,

Epistola ab Eminentia Tua transmissa sub die 18 iunii 1959 (Prot. 1 C/59) circa Oecumenicum Concilium a Summo Pontifice Ioanne XXIII indictum, pergratam mihi dat occasionem perpauca suggerendi quae, ut reor, ministerium nostrum in hac dissita regione valde adiuverent. Quae in mente habeo hic breviter adnumerantur.

1. Facultas binandi et etiam trinandi diebus ferialibus quando, data Sacerdotum paucitate et locorum distantia, plures fideles Sancto Missae Sacrificio et Sancta Communionem deberent privari.

2. Facultas distribuendi S. Communionem horis pomeridianis fidelibus qui, iusta de causa, mane praepediuntur venire, etiam si Missa non celebretur, servata nova lege ieiunii.

3. Facultas Ordinariis concessa anticipandi vel postponendi dies festos

« de praecepto » (Ascensio, Assumptio, Festum Omnium Sanctorum) quando dictis diebus fideles ad opus praestandum teneantur.

4. Facultas Episcopis concessa Missam « a solo » cantandi quando non adest copia Sacerdotum ad sollemnem Pontificalem Missam cum debita pompa celebrandam, vel Sacerdotes ad audiendas Confessiones addicti sint. Indigenae laudabilem habent consuetudinem semper die festivo Missam cantandi, quod ipsi maxime diligunt, et non consonum videtur eos spirituali hac consolatione privari cum Episcopus eorum Ecclesiam visitaturus vel ad sacramentum Confirmationis administrandum periodice accedit.

5. Facultas *de iure* concedatur Episcopis sacras Confessiones audiendi extra fines propriae iurisdictionis. Saepenumero Episcopus, per aliena loca pertransiens, ad quorundam confessiones audiendas vocatur et tempus non adest neque commoditas Ordinarium loci consulendi. Hoc speciatim accidit quando Episcopus ad conterraneos suos, quibuscum communem habet linguam, casu pervenerit.

6. Consulendum videtur ut Ordinariis in locis Missionum degentibus facultas concedatur, servatis servandis, dispensandi super impedimento ligaminis « in favorem Fidei », quod Privilegium Paulinum vocant, sine recurso ad S. Sedem, quod longum requirit tempus et multas causat difficultates. Hoc factum est pro mente habendum: gentes paganae nullam prorsus ideam habent de indissolubilitate matrimonii naturalis. Privilegium Paulinum latam aperit viam qua infideles ad sinum Sanctae Ecclesiae pervenire queant.

Sed in hac regione quamplurimae Christianae existunt sectae acatholicae quae Baptismum probabiliter validum suis asseclis administrant. Quando una pars in haeresi baptizata et persona pagana in matrimonio iunctae per divortium separantur, saepe saepius accidit ut pars haeretica Catholicam Ecclesiam ingredi cupiat et ad alias convolare nuptias cum persona catholica. In hoc casu Privilegium Paulinum non amplius tenet et ad Privilegium Petrinum recurrendum est, litteras mittendo ad Sanctam Sedem singulis in casibus. Iam vero responsio a Sancta Sede quam multum requirit tempus ut ad nos perveniat et, quando venit, personae de quibus agitur iam alium adiverunt locum et, in tanta multitudine, eos invenire impossibile evadit.

7. In Sancto Baptismate conferendo, quando ingens adest baptizandorum adultorum numerus, ritus qui pro parvulis in Rituali Romano datur adoptare liceat et petitiones quae N. 1, 14, 17 habentur non singulatim sed collective dicere permittatur, addendo numerum 18 et 19 supra unoquoque S. Baptismum recipiente.

Eminentissime Domine, hae sunt pauca vota quae Pontificiae Commissioni Antepreparatoriae pro Concilio Oecumenico submittere cupio si Eminentia Tua hoc opportunum in Domino iudicaverit.

Benedictionem Tuam humiliter imploro.

Eminentiae Tuae Addictissimus
in Christo servus

✠ FRANCISCUS C. MAZZIERI, O. F. M. Conv.
Episcopus Ndolaënsis

8

Exc. MI P. D. FRANCISCI MARKALL
Archiepiscopi Salisburiensis (Salisbury)

Salisbury, die 30 septembris 1959

Eminentissime Princeps,

Litteras tuas die 18 iunii datas accepi, quibus animadversiones meas circa res et argumenta quae in futuro Concilio Generali tractari poterunt isti Commissioni Praeparatoriae communicari invitavit. Audito ergo sacerdotum peritorum et prudentium consilio et rebus mature perpensis opportunum videtur puncta sequentia proponere:

1) Ut pro Missis dominicis nova deligantur epistolae et evangelia, quae facilius intellegi possint et ad instructionem pastoraalem fidelium magis apta sint.

2) Ut linguae vernaculae locus amplior in administratione sacramentorum concedatur.

3) Ut in compositione et collocatione festorum et temporum mobilium, ratio habeatur non tantum hemisphaerii septentrionalis sed etiam meridionalis, v. g. tempus quadragesimae, quod in hemisphaerio septentrionali tempore verno occurrit, in hemisphaerio meridionali tempore autumnali occurrit. Simili modo in hoc hemisphaerio legimus partem aestivam breviarii tempore hiberno.

4) Ut normae legis promulgandae revisioni subiciantur. Saepe enim annis recentibus in luce edita sunt leges, decreta et dispensationes generales, et per totum mundum in diariis perfusa antequam in commentario officiali prodierunt: v. g. Decretum « Sacram Communionem » die 19 martii 1957 datum expresse dicit praescripta vim suam exserere a die 25 martii, attamen fasciculo commentarii in quo prodiit hoc decretum apposita est dies 17 aprilis; unde habetur contradictio. Simili

modo saepius his ultimis annis accidit ut dispensatio a lege ieiunii pro aliquo speciali die concessa sit et in omnibus fere diariis mundi statim divulgata sit, notitia vero authentica dispensationis ita tarde ad Ordinarios pervenerit ut non possent eam in suis territoriis promulgare; unde factum est ut fideles notitiam quidem dispensationis habentes, dispensationem adhibere non poterant, quia ab Ordinario non erat promulgata; ideo ortae sunt querelae, etc.

Purpuram sacram summa qua par est reverentia deosculans commendo me

Eminentiae vestrae
addictissimus in Domino

✠ FRANCISCUS MARKALL, S. I.
Archiepiscopus Salisburiensis

9

Exc.MI P. D. DANIELIS R. LAMONT

Episcopi Umtaliensis (Umtali)

Umtali, die 1 septembris 1959

Eminentissime Domine,

Cum alii maiore experientia, sapientia et sanctitate praediti, iam Commissioni Antepreparatoriae consilia et vota digna discutiendi in futuro Concilio summiserint, non habeo quae mihi videntur digna tractandi nisi haec:

1) *Ut mariti digni Ordini diaconorum promoveantur in illis locis ubi penuria sacerdotum invenitur.*

2) *Ut abstinentia a carne feriis sextis in universa ecclesia aboleatur, et aliqua nova forma abstinentiae substituat.*

Impensus animi sensus ex corde profiteor Eminentiae Tuae, cui fausta quaeque a Domino adprecor.

Eminentiae Tuae Rev.mae servus in Christo

DANIEL R. LAMONT, O. Carm.

Episcopus Umtaliensis

10

REV.MI P. D. RENATI PAILLOUX

Praefecti Ap. Arcis Rosebery (Fort Rosebery)

Fort Rosebery, die 31 augusti 1959

Eminence Révérendissime,

Veillez trouver ci-inclus quelques notes en réponse aux questions de Votre Eminence Révérendissime, de qui je demeure le serviteur obéissant et respectueux en Notre Seigneur,

RENÉ PAILLOUX

*Préfet Ap. de Fort Rosebery*A) *De dogmatibus*

Dogmatica definitio de *universali meditatione B. Mariae Virginis omnium gratiarum mediatricis*, ad mentem S. Scripturae et Summorum Pontificum Pii IX, Leonis XIII, S. Pii X, Pii XI, Pii XII.

B) *De disciplina cleri - Reformatio romani breviarii*

Quod attinet ad hanc reformationem, duabus saltem vicibus, nempe annis 1956 et 1958, S. Congregatio Rituum inquisivit quaenam essent Ordinariorum Locorum opiniones.

Responsio mea, die 21 septembris 1958, Rev.mo et Exc.mo Apostolico Delegato tradita fuit, quae breviter sequentibus votis complecti potest:

1. Ut, rite consideratis multiplicibus officiis quae Clerus parochialis magis magisque perfungi debet, Breviarium cuiusque diei reduci possit *ad ritum simplicem*, propter hanc praesertim rationem quod maior est spes attentae ac devotae recitationis si ritus simplex breviorque sit.

2. Ut *prioritas officiis de Tempore potissime detur*, cum sola commemoratione Sanctorum in Laudibus vel Vesperis tantum, ita ut sacerdotes maiores fructus ex meditatione liturgicorum mysteriorum capere possint.

3. Ut *auferantur omnes loci*, praesertim ex Vetere Testamento, *qui de odio inimicorum, aliisque similibus, loquuntur*, necnon aliqua vocabula (v. g. « Nigritae ») quae ab aliquibus gentibus (v. g. Africanis) ut irrivrentia habentur.

C) *De dira, penuria, quae viget in missionum regionibus, religiosorum fratrum et sororum, praesertim quod attinet ad scholas catholicas cuiuscumque gradus, necnon ad nosocomia aliaque opera caritatis.*

Fas sit mihi hic loqui de hac Missionis regione in qua laboro. Nemini dubium est quin tales Religiosorum Fratrum et Sororum Congregationes magnum incrementum propagationi Verae Fidei afferre possint.

Triste est videre quod parvum ad nonnullas istas congregationes attinet quin Verbum Dei propagetur in Missionum regionibus. Zelus proprie apostolicus deesse videtur, et nonnullae Congregationes, etsi sufficienter opulentae sint in Europa vel America, novas fundationes in Missionum territoriis aperire nullo modo urgentur, nisi de domibus ab Ordinario Loci aedificandis et redivisibus ab ipso vel Gubernio solvendis prius certae fiant.

Valde utile esset si Sancta Sedes istas Congregationes urgere posset ut se particularibus Missionum territoriis devoveant et partem saltem sumptuum impensam praestare acceptarent.

D) *De sacra liturgia: Usus vernaculae linguae*

1. *Ordo Hebdomadae Sanctae.* Potestas qua celebrans, in Dominica Ramorum et Feria VI Maioris Hebdomadae, Passionem legere (vel cantare) possit in lingua vernacula, necnon Lectiones, Prophetias et Cantica, v. g. Exultet, quibus sensus fidelium exprimuntur, durante Triduo Sancto.

2. *Missa:*

a) Usus vernaculae linguae in Liturgia Verbi, simul cum adaptatione textuum Epistolarum et Evangeliorum ita ut Liturgia Verbi meliorem catechetico-pastoralem effectum habeat.

b) Introductio « Precum fidelium », in forma dialogi in vernacula lingua, tempore Offertorii.

c) Adaptatio omnium precum a communione usque ad finem Missae ita ut eucharisticus sensus in lingua vernacula expressus melius foveatur.

3. *Ordo Baptismi adultorum.* Nova distributio ceremoniarum Baptismi adultorum, ita ut istae ceremoniae disiungi, et, ut ita, dicam, per partes conferri possint.

E) *De actuositate multiplicis generis qua hodie Ecclesia tenetur*

1. *Educationis et caritatis opera* maximum momentum habere hisce temporibus in Missionum regionibus iam statuimus.

Valde optandum est ut Religiosae Familiae Fratrum et Sororum ad

ista opera adimplenda se sponte offerant, et, cum ad unum territorium venerint, opera sua ibidem, totis suis viribus, extendere satagant priusquam ad alia territoria se vertant.

2. *Actio Catholica.* Nova declaratio, qua supra-politicalis character Catholicae Actionis asseratur, valde utilis foret, ea maxime ratione qua nonnulli Christifideles politicalem actionem cum Catholica Actione miscere inclinantur.

F) *Negotia maioris momenti, quae Ecclesia obire hodiernis debet temporibus.*

Cum, hodiernis temporibus, multa dicantur de politicali independentia Afrorum populorum, et haec quaestio, praesertim in hac particulari regione vulgo nuncupata « Centralis Africae Foederatione » haud parum cum difficili quaestione multi-racialis societatis connexa est, valde utile foret Ordinariis locorum si clarae normae ab Apostolicis Delegatis et Provincialibus Hierarchiae Conferentiis proprio tempore datae fuerint. Imprimis si accuratae informationes de similibus quaestionum solutionibus in aliis Africae partibus Ordinariis locorum, ad eorum iudicium efformandum, dari possent.

Superfluum non est hic statuere Apostolicam Delegationem de Mombasa nimis remotam apparere. Ex hoc casu, Ordinarii locorum aliquando nesciunt quid in difficillimis rebus facere debeant.

G) *De relationibus cum protestanticis sectis*

In mente habemus Monitum a S. Officio datum die 5 iunii 1948, necnon eiusdem S. Concilii Instructionem diei 20 decembris 1949, et, sine ulla dubitatione, nos iis documentis firmiter adhaerere declaramus.

Nihilominus non raro nosmetipsos interrogamus quid agere debeamus, quod, practico modo, Unitati Sanctae Ecclesiae conducere possit.

Per exemplum, quid sentiendum esset, si catholici qui Bibliam in vernacula lingua non habent uterentur Biblia protestantica dummodo libellus cum explanatoriis notis a catholico Ordinario rite approbatus suppedigaretur?

H) *De Sacramentis: Baptismus*

1. Quid sentiendum est de diuturno Catechumenatu? An intensitas instructionis breviori tempore supplere potest?

2. Quod attinet ad validitatem Baptismorum quae in variis Protestantibus Sectis conferuntur, clara expositio valde utilis foret actuosis sacerdotibus qui in Missionum regionibus laborant.

RENATUS PAILLOUX
Praefecti Ap. Arcis Rosebery